

Filmiliortarneq pillugu Inatsisartut inatsisissaannik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.

(Inatsisartunut ilaasortaq Peter Olsen, Inuit Ataqatigiit)

Akissuteqaat

(Meeqqanut, Inuussuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartuni ilaasortaq Peter Olsen, Inuit Ataqatigiit, Inatsisartut aalajangiiffigisassaattut siunnersuummik saqqummiussaqarmat qujapput.

Naalakkersuisut filmiliornernik suliassaqarfik immikkut ittumik Inatsisartut inatsisaannik peqartillugu nukittorsarneqarsinnaallunilu nukittorsarneqassaaq. Taamaattumik Naalakkersuisut aalajangiiffigisassatut siunnersuut nuannaarutigalugu isumaqataasinnaapput.

Qaammarsarneqassaarli eqqumiitsuliornermik ingerlatsineq pillugu Inatsisartut inatsisaanni nr. 11, 6. juni 2016-imeersumi, kingullermik Inatsisartut inatsisaatigut nr. 33, 13. juni 2023-meersutigut allanngortinneqartumi naapertorlugit filmiliornernik suliassaqarfik aalajangersarneqarmat.

Ilisimatitsissutitut oqaatigineqarsinnaavoq UPA2022/75-imik akuersissuteqarnermi suleqatigiissitamik pilersitsisoqarmat taannalu nunatsinni filmiliornernik suliassaqarfik qanoq nukittorsarneqarsinnaasoq pillugu siunnersuuteqarsimalluni. Suliassaqarfinnut pingasunut tunngatillugu suleqatigiissitap suliatigut siunnersuutai:

- inatsisit
- atuuffiit, kiisalu
- atortut.

Naalakkersuisut nassuiaamminni ilaatigut oqarput filmiliortarneq pillugu Inatsisartut inatsisissaattut siunnersuummik suliaqalersaartut, ilaatigut filmiliortarfik filmiliortarnerillu pillugit isumalioqatigiissitaq pillugit malittarisassaqtussamik. Tassunga tunngatillugu sulinermit qulequtaasoq oqaatigineqarpoq. Tassa imaappoq inatsisiliornissamut piareersaannermi Inatsisartut inatsisaat allatut qulequtaqartinneqarnissaa naleqquttuusinnaasoq. Imarisassaattulli eqqarsaatigineqartut assigiissinnaapput. Taamaalilluni Naalakkersuisut siunnersuummut isumaqataanerat taamatut paasinninnertaqarpoq.

Siorna Naalakkersuisut kulturi pillugu isumasioqatigiissitsipput eqqumiitsuliortunit tamakkuninngalu suleqataasunit peqataalluarfigineqartumik, tamatumani eqqumiitsuliorneq eqqumiitsuliortullu takunneriaasiat qitiutinneqarlutik. Isumasioqatigiinnermi suliassaqarfiup nukittorsarneqarnissaanut periarfissanik misissuinissaq siunertaraa isumasioqatigiinnermilu siunnersuutit 38-t oqaasertalersoneqarput. Inatsisiliorluni suliaqarluni piareersarnermi siunnersuutit filmiliornernik suliassaqarfimmut tunngasut Naalakkersuisut aamma misissorniarpaat.

Taamatut oqaaseqarlutik Naalakkersuisut siunnersuut akuersissutigineqassasoq inassutigaat.